



本著作以創用CC「姓名標示-非商業性-禁止改作」4.0國際授權條款釋出。
詳細授權條款，請至 <http://creativecommons.org/licenses/by-nc-nd/4.0/>。
資料來源：教育部電子報「閱讀趣聞客語」專欄 <http://epaper.edu.tw>。

閩／懷想／☆☆☆★

兩斗米換一間樓仔厝

自古以來，每一個所在擁有在地流傳的故事。

外公是屏東地區飼蜂的老前輩，做人海派袂恰人計較，朋友誠濟。飼蜂界較有歲的人攏捌伊，嘛真尊重伊。佇一擺鄉土文化的研習當中，一位在地的老師聽著我提起外公的名號，當場就恰逐家分享這個故事。

佇二次世界大戰的尾期，日本漸漸欲戰輸矣。為著欲支援前線的戰爭，日本政府共臺灣較值錢的物件攏徵收去，引起民間的物資欠缺，連糧食嘛是用配給的。因為配給的數量有限，毋管是米、油、鹽、肉……等等，逐項物件攏無夠通食。老百姓定定食袂飽，半枵半餓，日子過甲誠困苦。

蹕佇屏東市海豐里的張先生，伊咧飼蜂，家己閣有幾分地咧種作。因為伊知影蹕佇街裡的老朋友厝裡頭喺濟，配給的米糧絕對無夠通食，就共家己種的粟仔，偷偷仔藏一寡仔起來，無交出去。才閣倩人用「塗礱」共粟仔挨予好勢，窮窮咧，拄好有兩斗外，家己留一寡仔，冒著空襲的危險，兩斗米揸咧，對海豐寬寬仔行。行五、六公里遠，總算行到老朋友的厝裡。

老朋友看著這兩斗米，真正是焦田塘著雨，閣看著張先生揸甲大粒汗細粒汗，感動甲目屎流目屎滴。伊共張先生的手牽咧講：「老細的！我已經三個月無食著白米飯矣，你真正是我的救星。為著欲答謝你，佇屏東陸橋跤遐我有一棟樓仔厝，是咱屏東上鬧熱的所在。你若無棄嫌，我就共厝送你！」毋過，張先生並無答應，閣共講：「三八咧！憑咱的交情，這兩斗米算啥！莫講彼有的無的，米收起來就著矣！」

人講「患難見真情」，彼位張先生就是阮外公。因為外公無欲偏人，所以這個故事就流傳落來。佇屏東市海豐里彼个所在，逐家攏呵咾個两个真正是生死之交，嘛一直講外公重義氣、有度量。毋過外公並無共這層代誌因佇心肝內，攏毋捌講予序細聽。這馬會當對外人的喺裡聽著這個故事，做囡孫的阮嘛感覺誠光彩！

作者：陳秋貴

☆詞彙學習☆

【塗礱】thôo-lâng：礱殼機。能除去穀粒的外皮，使它變成糙米的機具。

【挨】e：磨。

【窮】khîng：清理、整理。

【偏】phinn：占便宜。